

莆

陽

文

獻

方陳徐林傳第十三

方慎言字應之延範第五子仁載之孫也第咸平三年進士知信豐蘭溪二縣號稱神明祥符初以殿中丞受詔往淄青數郡均給蠲賦使還稱旨許擇近地便養通判福州仁宗即位改侍御史屬丁謂貶崖州遣慎言籍其家得士大夫干請書問悉焚之人稱其長者請便郡知泉州歲饑大發官廩以貸民又奏免丁稅全活者衆父老相泣曰微方公我輩無以生又何有子孫哉自是生子多以方兒名歷兩浙轉運使浙河之漕歲百萬石願指而集景祐初錢塘江決數

十里慎言親庀工授材疊石列大木以殺潮勢賜璽書褒美改知潭州處劇而裕潭人像而祠之入為諫議大夫會擇重臣鎮南越遂以朝請大夫知廣州卒贈開府儀同三司慎言既貴先推恩於從父昆弟而後及其子迨沒而孫尚白衣人服其義從孫适元符三年以特奏對策殿庭乞復元祐皇后上不加罪命收寘後名尋又上書謂秦人緘口腴誹而享國日蹙東漢宦官擅權而桓靈以降所存者位號武王數紂之罪在於臺榭陂池侈服以殘害百姓所言皆譏切時政衝替求不得改官詔籍上書邪等人而适與焉

孫通熙寧六年以明經第歷遷親賢宅博士徐卽福國夫人馮氏安康即王孝騫母也謫居瑤華通語王惟勤孝足以動天地感鬼神因為草奏啗哀請命于上朝廷為之惻然遂矜宥出知睦州以最聞除王府翊善坐子軫上書論列蔡京謫官以朝請大夫老于

家

雜出何志寺書

軫以父任太廟齋郎蔡京復相天下事滋壞軫疏列其過千二百餘言其略云京睥睨社稷內懷不道專以紹述為自媒之計上以不孝劫持人主下以謗訕詆誣天下交通閭寺納結宮禁靈國用則若糞土輕

名器以市私恩尚書省元豐所造京惡其地不利宰相奉命毀之建四輔郡屯兵數十萬遣門人為總管又以宋喬年為京畿轉運密諷兗州父老詣闕請登封意在為東京留守奉與一動投間竊發呼吸群助不知宗廟何所依倚乎又建方田法欲拔百姓而鹽法朝行夕改鈔為故紙鹽為棄物號泣籲天赴水自縊者不知幾千萬人元符末年陛下嗣服忠義之士投匭自見者無日無之京分為邪等黥配絀置不齒仕籍則誰肯為陛下言哉又遣子攸日與陛下遊戲惟以花石禽鳥為獻飲愚陛下使不知天下治亂自

古人臣之奸未有如京今日之甚陛下安可愛一國  
賊而忘社稷生靈之重乎詔以疏宣示京京請付有  
司推究於是命御史臺鞠治獄具詔貸死編管嶺南  
靖康元年軫詣登聞鼓院上書陳訴始得收叙

出米鑑編

年備要等書

方慎從字惟之慎言弟也景德二年登進士甲科受  
秘書省秘書郎歷知弋陽懷寧同安懷安導江蘭溪  
六縣通判饒州荆南府知潮漳嘉三州再知漳州改  
都官郎中以老歸卒慎從所至有德於民在導江日  
有楠木連理嘉禾九穗之祥璽書褒異守漳日適慎

言守泉州旌麾相望二州人榮之及再至漳人夾道  
歡呼曰吾父復來矣子諫臣侍官于漳手斷合水孽  
蛟死漳人憐而祠之封清水侯孫价初名儼熙寧六  
年進士大觀初知安豐縣用薦召赴都堂審察蔡京  
以价不肯私謁報罷復知候官縣已而掛冠里居二  
十餘年終曾孫禧為殿中侍御史初慎從在嘉州手  
植荔枝于郡圃賦詩有留取清陰待子孫之句至大  
觀中禧持節按蜀部學嘉父兄擁車誦慎從詩為賀  
族孫旬紹聖四年進士除太學博士歷提舉廣東京  
西學事通判建州時劇賊范仙桂嘯聚境內旬躬督

捕梟榜許自新賊徒殺仙桂以降移衢州卒贈中奉

大夫有文集藏於家

櫟出方志等書

陳侗其先潁川人遠祖邁唐武德初令莆田始家刺  
桐巷曾祖正則從陳洪進入朝以詩為太宗稱賞祖  
絳咸平二年進士甲科累遷工部郎中知河陽府移  
福州先是夏竦與絳同試制科舉賢良有憾於絳及  
竦執政絳展轉外任卒絳子動之說之同登天聖八  
年進士官竝至秘書丞侗與弟睦俱動之子也侗嘉  
祐二年進士英宗朝韓琦文彥博諸名公交薦侗宜  
在館閣富弼守汝州辟侗為從事會弼歸執政即召



試除館閣校勘出知陝州蘇軾嘗送以詩繼知潮州  
劉摯亦送以詩皆極推重之睦嘉祐六年進士第二  
累遷史館脩撰判尚書刑部進鴻臚卿命草書慰問  
高麗嗣王神宗稱美之以寶文閣待制知廣州卒贈  
少保睦子彥文以職事登對稱旨賜進士出身歷戶  
部侍郎顯謨閣直學士知慶洪楚江四州在江州時  
盜張遇犯州城彥文擊走之建炎初除江淮制置使  
許入都堂議事卒侗之子彥恭

州縣志謂同之祖蘇

彥恭字子愿元祐三年中進士乙科調太平州司法

擢編脩勅令所刪定官以事忤蔡京改宣議郎通判  
保州代還京當國復通判代鞏二州鞏被邊官吏習  
用庫錢彥恭獨守法具條其宿賍十餘萬其風為變  
熙州姚雄請以弓箭手墾田實邊宣撫使童貫忌雄  
陰沮之州縣莫敢忤彥恭推行之歲得米九萬斛貫  
至鞏守帥以下屬屬鞏鞏拜道左彥恭獨朝服揖貫茲  
不悅會罷歸除提轄河東坑冶鑄錢京以其黨王桓  
無之桓欲增監鼓鑄其數倍經彥恭曰山澤之利不  
可竭祖宗之額不可踰以此病民吾不忍也桓怒以  
聞罷歸久之提點九路坑冶地綿百餘州前職率憚

險遠家居可不事彥恭冒風濤瘴癘周行萬里至課  
羸十倍知壽春會金人寇京師王室來告難彥恭讀  
詔書泣下悉禁族而西或曰世亂如此空一府無兵  
可乎彥恭曰陛下安在而守臣欲留兵自衛耶旣而  
叛將李安提兵及疆劇賊李全亦竝城宵掠彥恭單  
騎叩安營諭令討賊安聽彥恭乃整全安以兵會之  
斬全師還厚犒安等趣其兵西州以無事歲餘復請  
祠繼地至會稽請老卒葬平江出方志  
徐確字居易寅六世從孫曾祖昌嗣以明經除秘書  
郎陳洪進辭掌書記宋初首勸洪進納土洪進款害

之遂走京師及江南平洪進始悟其忠乃命其弟昌  
圖與陳仁璧奉表上版籍確元豐五年試禮部第四  
策丙科尉永泰俗喜屠牛確嚴禁之會令之子病思  
啗牛心屠者市一犢將殺之犢嚙刀奔尉治確適造  
縣庭犢走縣庭下確令跡所往為驗治屠者送牛承  
天寺為長生牛提點刑獄祖無頗刻石記其事時蔡  
京以宮祠寓居與確有鄉舊確既改官京入相欲留  
置講議司確辭從吏部選知象山縣久之召為宗正  
丞出使兩浙提舉常平適大水歲飢確考禹貢三江  
之說得吳淞古江以為太湖東注入海吳淞江在下

流向者潮泥湮塞水溢為患請自封家渡古江開洶  
至大通港直徹海口計七十四里役徒二百二十萬  
柴千餘人以常平錢米一十八萬三千餘貫石充和  
雇之費水道遂通明年三月詔以役人死亡者衆水  
仍為害百姓怨咨皆坐貶降神見宋史後確守江州  
中貴人使具舟載花石以貢確拒之司諫陳瓘方謫  
居確時往來且書抵蔡京曰瑩中久廢宜平前冤少  
伸忠義之氣入為尚書刑部員外郎轉朝奉郎致仕

卒子師仁壽仁

雜山何  
志等書

師仁字從聖幼敏悟甫七歲過外祖家外祖讀霍光

傳疑光何以為不學無術師仁曰伊尹放太甲而光不知非不學耶外祖大驚大觀二年年十八與從叔昭同登第任泉州司法叅軍調袁州司曹召為秘書省校書郎時脩史極天下之選得四人倪若川劉大中汪藻而師仁居其一除編脩遺史檢討官兼次崇文總目閱再歲遷著作佐郎在東觀因得未見之書晨夕披讀文章益汪洋落筆數千言追配古作者有集行於世出何志等書壽仁字子由天資曠達好讀書搜羅今古為文欲追古作尤長於詩嘗遊場屋不偶遂東書遊四方遇佳山水必極興而後返晚乃傍所居

築坡種菊自號菊坡叟中葺數椽命其菴曰夢蝶軒  
曰觀魚臺曰漉酒陳正獻俊卿梁文靖克家王龍學  
十朋皆有詠贊年八十餘卒

出彭志

方偕字齊古隋泉州長史叔達之後也父鼎太平興  
國初從陳洪進入朝累贈工部侍郎偕十四歲能為  
文二十及進士第為温州軍事推官歲飢民欲謀軍  
就廩食州不敢擅募偕乃詣提點刑獄呂夷簡曰民  
近流亡不早募之將聚而為盜矣夷簡從之籍為軍  
凡七千人後遷汀州判官唐肅使福建以建安多訟  
日數千百人檄偕權蒞旬月而訟清縣產茶每歲先

社日調民數千鼓譟山旁以達陽氣偕以為害農奏  
罷之累遷屯田員外郎御史中丞杜衍判審官院以  
偕唐肅所慰薦必其才行卓於人薦為御史堂推直  
官澧州逃卒傭民家自給一日誣告民事廢馳神歲  
殺十二人以祭州逮其族三百人繫獄久不決苗被  
詔就劾令卒疏所殺主名按驗皆無狀事遂辨卒以  
誣告論死御史知雜事龐籍薦為御史裏行再遷侍  
御史南京鴻慶宮灾偕引漢罷原廟故事請勿復脩  
元昊寇塞門鄜延副總管趙振逗撓不出敕詔偕往  
按之法當斬偕奏兵寡不敵苟出以餌賊無益也振



由是得不死為開封府判官奉使安撫江南東西先是轉運使第民產高下給以乳香令民輸絹償之吏緣為奸民輸絹者率空手去三司出錦綺下州郡鬻之促期歛錢而帛無所用偕奏罷之擢天章閣待制江淮制置發運使知杭州遷刑部郎中偕以吏事進

治杭州有能聲遷光祿卿卒

雜出宋史本傳等書

林積仁字充美蘊之後幼而傑異身長七尺豐額駢齒聲如鐘登紹聖四年進士歷知甌寧縣甌寧巖邑民稍失職則竄去為盜積仁諭以人情三歲益萬五千餘戶時以八最四善課群吏而甌寧為第一徙知

北海縣河歲決積仁伐石障水自是無患民疾病轉徙無歸者為之具醫藥秩滿再留凡伍年尋改提舉河東路河東歲惡積仁發廩賑饑流民存活者益衆屬靈夏用兵轉餉盡出河東特轉中奉大夫尋知平陽府纔歷旬朔革去蠹壞及移京畿提點刑獄人皆牽衣泣送之靖康初平陽父老走闕下乞積仁為守以中大夫直秘閣再領平陽望馬首而拜者合沓至寫像家置之未幾以疾乞致仕紹興初起知筠州封長興縣男解去起為廣南東路計度轉運使卒于官初潮陽有健令楊首年之獄累歲不辯逮至數百人

積仁過潮一日而決及是匱東下潮人時哭之甚哀  
贈左光祿大夫積仁天性疆直若不可犯與人交必  
呈寫肺肝僚屬或過差未嘗輒加怒辱婚戚之空乏  
者悉分祿賙之林艾軒嘗狀其行云

出何志  
等言

林之平字國衡藤十世孫也崇寧五年擢第累遷監  
察御史建炎初隆祐太后南渡特詔臺官譏察州縣  
之平乞降睿旨存撫州縣以彰主上慰安太后之意  
深契上心洎朝見太后乃撫恤軍民群情感悅浙右  
州縣有非汎科率者即按罷之三年二月車駕南渡  
之平由海道徑赴行在上以長江守禦之策適詢詳

臣議者陳招募海舟為不虞之備復詔之平為福建  
廣南路招募使之平歷閩廣募六百餘艘由溫台赴  
行在適移蹕永嘉海道支費無闕之平有力焉時朝廷  
議福建行鈔鹽權酤之法之平奏請全閩不過數郡  
州縣藉鹽綱以為供億之費編民資廼葉以為伏臘  
之養上可其議悉罷之召赴行在除右司員外郎時  
金虜犯浙右朝廷以所募破賊推恩轉朝散大夫遷  
左司上以防秋軫慮欲選朝臣出守永嘉執政薦之  
平忠力可倚除直龍圖閣知溫州至則奉安諸殿神  
御戒嚴守禦尋以疾丐祠上念其功特授泉州卒于

官終左朝請大夫

山何志等書

方陳徐林傳第十三

方峻方嶠傳第十四

方峻字景通廷範之後有名衡者與其弟彬始居白杜峻衡之子也天聖八年進士為建安簿景祐初試秘書郎福州左司理嘉祐中請老分司南京居于家榜所居曰植德堂堂之南曰小隱聚徒講學嘗於所居東北鑿井既及泉峻禱曰願子孫居官清白如此水初峻官潤州識程珣及卒珣之子頤既為狀其行又托范祖禹為撰神道碑子三人士寧子容元宋士寧字彥昌少聰敏強學時方習尚詩賦士寧推究經史尤工古文詞凡四上鄉書第慶曆六年進士嘗

為劔浦有治績三司使蔡襄薦其才從而薦者十餘人官至都官郎中

出宋史卷一百一十五

子容字南圭皇祐

五年甲科歷守惠州蘇東坡謫惠日相與倡和東坡嘗為點勘六經及書峻神道碑額官終朝請大夫

出方

志等

元宋字道輔元祐六年特科出身少與程伊川

同遊潤學至老書問不絕家藏伊川真跡十餘紙有比得二書皆有與世背馳求合古聖賢之語足下非混淆之流其志道之士乎願愚無他能斷斷聖人之道有年矣非徒自盡其心而已思欲天下之心吾心也故因足下之言探足下之意欣然不能已願足下

精心致志期於至而後已聖人之道坦如大路學者  
得其門而入無遠不可到也足下由經以求道勉之  
又勉異日見卓爾有立於前然後不知手之舞足之  
蹈不待勉而不能自止矣元寀官終威武軍節度推  
官

出方志  
等書

絢字君素子容之子也篤學力行好為古

文尤工詞賦壯年嘗一再至京師然非其志晚年部  
使者以八行舉辭不就工於書篆詩亦清婉尤喜集

古嘗隱居西山草堂門人號曰濯錦先生

出何志各  
等書

字作謀子容之孫也大觀中由崇德尉召除刪定官  
累遷脩書局請外提舉廣東常平宣和初在京東以



不附燕雲之議忤王黼貶知瓊州先是累政不治略下車之始恩威並行為文勸諭黎蠻使不為民擾民德之改知潮州建炎中秩滿而歸年方四十八上章丐祠平生居官廉貧惟喜貯書有萬卷樓弟昀字文耕以略奏補官紹興中知長溪以廉謹聞葉顥嘗對人稱其清貧既而得替到京得潮州通判未上卒初昀無居室寓華嚴寺中及是貧無以為喪郡守鍾離松出俸三百緡給之而族人復相與出貲助焉出備者翊字次雲元寀之孫父金與鄉書終其身不至都下者羽六歲而孤多所通解書一過目即貫穿下筆有軌

語其從兄略作萬卷樓儲書千二百筭語翦曰次雲  
才性不出戶十年可移吾書入肝膈矣及登紹興八  
年進士第調閩清縣尉到官未一載歸閤戶十八年  
盡讀其書無干進意一第三十年所書裁三考有旨  
召對除秘書省正字凡九月以風聞論事聽外補卒  
于家初翦與林艾軒俱在錢塘艾軒喜李太白石曼  
卿之為人又愛晉人風度不入俗調翦曰此數人來  
孔門恐一日著脚不得艾軒遂愧悟以翦為先聞道  
兄事之蓋楊龜山之學傳之王信伯信伯傳之鹽官  
施廷先翦與廷先居最久至是艾軒亦定交焉及翦

歸益與父軒講明道理以淑後進

韓出父軒文集

耒字耕道元宋之曾孫少孤苦學弟子來耒皆自教之每歲輒具終歲之糧兄弟杜門不出親朋罕見其面既而師事朱文公于建安乾道中登第調潭州善化尉復謁張南軒南軒深喜之謂世之可與共生死同禍福者耒一人耳後南軒帥荆南辟耒及游九言為屬曰是二人者能攻吾過失耒感激知己遇事無隱改知攸縣終宣教郎知連江縣耒字耕叟亦登文公之門文公告以改過脩己之方莫切於論語弟子入則孝一章耒佩服之

出朱子大全等集

壬字若水元宋之曾孫淳熙中遊太學往返建安必  
參謁朱子十四年擢第除長泰縣主簿朱子適守漳  
請壬主學事壬條上講說課試差補等十事朱子令  
屬邑皆倣之學舊取陂塘錢穀以廩士壬以學校道  
義之地不可納無名之賦請於朱子以廢寺租代其  
輸又請蠲僧寺子斗錢罷科茶錢皆如其言及朱子  
召還出大學章句付壬俾刊示學者明年龍巖有變  
卒殺人獄吏抑同行者誣伏漳浦有僧斃於佃而鞠  
驗者皆曰服毒壬以郡委閩實抵卒及佃罪朱子聞  
之與壬書曰龍巖之行使無罪者不以冤死有罪者

無所逃刑此非細事秩滿除知寧鄉縣未上卒壬性  
孝友篤守家法與弟申居終始無間言家人議析先  
世田廬既具草壬流涕不忍視而止此事之泰字嚴  
仲壬之孫紹定五年第進士歷英德府教授課試略  
如中州士習一變方大琮為閩漕辟幕府與洪天錫  
徐明叔號三賢幕遷知長溪縣以邑前輩楊楫楊復  
及師儒黃幹並祠焉汰庠序冗職增弟子員民間慤  
米價重取例錢盡蠲之終袁州通判嘗哀拾其外祖  
林光朝遺藁為二十卷出通  
方嶠字次山與兄峻皆贈金紫光祿大夫世稱白杜

二金紫嶠景祐元年進士初調平陽尉改福州司理  
叅軍州民鄭以誣繫獄守促令引服嶠力辨其寃守  
不能奪鄭感泣畫像祠之遷秘書省著作佐郎知山  
陽縣移知循州吏多狡悍不法嶠廉得首惡數輩流  
之郡中肅然改秘書丞就遷太常博士知潮州潮與  
循隣民熟知其治行不待教而服兩州皆為立祠而  
潮以配韓愈改屯田員外郎通判淄濰二州遷都官  
員外郎屬歲荒安撫使命權密州嶠撫循有方密人  
德之故相龐籍學士孫沔交薦可用余靖韓宗彥又  
舉才行遺逸會遣使寬恤諸路民力迺以嶠使福建

嶠詢訪利病條上多見施行英宗即位改職方員外  
郎通判吉州時汀虔私鹽寇發遷知汀州嶠至鈎得  
酋長三人蠲其宿負令捕賊自贖未幾各獲賊首以  
獻嶠許其自新給以袍帶委之守捕自是賊發輒獲  
遷屯田都官郎中汀有巡檢與賊戰死其部卒懼誅  
遂謀為亂嶠諜知其首謀三人斬之餘悉奏免所  
活數百人遷司封郎中改太常少卿被旨赴闕方欲  
大用之以疾求散地得分司南京尋乞致仕歸卒子  
六人長伯騫補候官尉有盜殺人追捕無驗伯騫聚  
里民詢其姓名至曾忍著熟視之曰殺人者若也一

訴而服移建陽丞適部使者行縣欲據令事諷伯騫  
使言且許薦之伯騫謝曰塹人以自進所不敢為且  
實不知知亦不當言也官終會昌令次仲字少穎悟  
日誦數千言十二從胡安定學諸生常千餘人較藝  
屢居上列擢治平四年進士官至著作郎知南安縣  
次叔完元豐中補候官令民以築港瀦水害懷安民  
田二邑交訟叔完往按之曰吾為令豈私吾民耶乃  
命改築以曾鞏薦移知祥符號繁劇叔完治之無留  
獄官至廣東運判次宙熙寧六年進士由京東檢法  
召對除司農丞耻為章蔡所舉乞補外遂提舉京西



常平奏乞給還程伊川舊買汝州荒田又以范伯揆  
唐義問皆名臣之後乞加獎擢出方志曾孫審權初  
遊江湖所至交其豪俊及歸慨然罷舉業超搖物外  
有以自樂與王邁方蒙仲劉克莊友善性好吟咏

蛙集

出備

方會字子元嶠之從孫少穎悟年十二為文賦十五  
通經義十七首鄉薦第熙寧九年進士調揚州司法  
叅軍移建州教授學政大將八州之士群至朝廷陞  
十帥府遴選守臣以會知越州充兩浙安撫使繕城  
隍創樓舡上所撰水戰法其法方員縱橫用六六舟

為陣得六花八陣之意以時肄習進退疾徐如在平地會在越五年杜私謁簡厨傳省追呼人以不困政和二年召還入對徽宗曰卿場屋程文士人傳誦浙東政蹟列郡推先獎諭再四累爵文安郡開國侯卒贈太師會性孝友為待制時以郊恩奏季弟畬為登仕郎子昭崇寧四年銓試第一官至駕部員外郎暄光州司法叅軍始會在壽春愛羅山之境因墓焉建炎初虜泊維揚散兵兩淮發人塚墓暄恐會墓不免號泣赴援遂遇害

出方志等書

士繇字伯謨會之曾孫也父豐之工詩朱文公嘗稱

其豪壯士繇早孤依母家邵武呂氏屢試有司不偶已而徙家崇安從文公遊遂廢進士業直以學古為事薰陶涵養日進高明方是時及文公之門者百千人而士繇年甚少學甚敏不數年遂稱高第六經皆通尤長於易聰明絕人而持之以孝謹將之以謙厚資產有無一不掛口其氣貌簡遠涉世若甚疎而講論治道援古證今瞭然明白紹熙間文公之門人有至行在者公卿延致惟恐後士繇在遠聞之曰異時必為學者禍未幾學禁果作矣又嘗勸文公少著書以文公教人讀集註為未然其憂深思遠多類此云

出  
等書

方峻方嶠傳第十四

余黃吳李蘇林傳第十五

余祖奭字景石初名祖禹其先由下邳遷遂安又遷建陽至唐校書鎬始居莆之黃石父振贈金紫光祿大夫祖奭幼穎悟絕人未冠補太學生為學官鄭棣范祖禹及同舍生胡安國宗澤所器愛登元符三年進士第歷秀福清三州教授再轉通判建州鄉人林孝淵母老遠倅于邠慨然請易之自邠移蘭州會地大震山崩城郭廬舍盡陷祖奭若有神扶護置之隙地者亟拯傷殘活數百人廕死賑饑恩卹備至蘭人德之代還主管福建轉運司文字時建卒葉儂叛祖

爽挺身諭以逆順賊遂退以功轉朝散大夫知南恩  
州屬海寇卓全高聚衆為暴祖爽控制有道賊不敢  
犯召對指陳時弊忤秦檜意遂引疾丐祠歸封文安  
縣開國男祖爽性至孝母喪廬墓父喪過時猶毀瘠  
其露降于塋林者兩月因名其墳菴曰甘露城東有  
白湖港祖爽捐資倡鄉人伐石梁空醺為十道行者  
便之子武弼紹興四年應法科中第一人移福建檢  
法官時臨汀嘯聚成禽多武弼之策轉承議郎知南  
安縣民甚戴之至群禱菴祠祝其勿遽去以父老力  
丐歸養初武弼三歲喪母事繼母尤恭謹居父喪哀

毀羸繭食不下咽未及期而卒林父軒狀其孝行

方志  
年書

黃琮字子方璞之後擢元符三年進士第調長溪尉  
戢吏便民丁父憂邑令憫其貧加錢幾千緡以贖琮  
却之徒步護喪歸知閩清縣時方興道藏安撫黃裳  
命屬縣歛民錢各數百萬琮獨不應命自詣郡以已  
俸四月輸之民立生祠改知同安縣民復祠之繼以  
漕臺檄攝候官縣縣有余太宰香火寺倚勢不輸上  
供銀每移增於諸利琮嚴加徵督時謂其清廉無比  
執拗有餘除通判漳州時鄉人方翼為守琮與之可

否相濟卒成美政未幾致仕給事中傅崧卿薦之于  
朝曰政宣閭邑今以治行稱者黃琮陳麟翁谷閩部  
號三循吏而琮為之冠乞起用不報居母喪哀瘠不  
食甘露降於總幃郡縣廉訪琮曰豈敢以冥漠要人  
欺君耶歷官三十年無一夫之田五畝之宅退休衡  
門十八年處之泰如也年八十卒於家

出何志

黃彥輝字如晦璞之後少嗜學弱冠已有俊聲以伯  
祖隱名在元祐黨籍禁錮不得應試既而星變黨禁  
解始得貢太學第宣和三年進士攝候官尉時方募  
兵以衣糧不給作亂監司促附城三尉捕賊甚急彥



輝獲七十餘人而二尉一無所俘當坐譴彥輝乃分首級畀之俱獲免差知羅源縣先是邑有不逞者冒衣冠子弟請托紛然官稍清嚴則浮言噓扇彥輝至務清心守已不問其他偶首惡者冒名投牒輒加顯辟以警衆其風遂息宗室有不塾者陵轢官長豪奪民財彥輝榜諸色人告不塾暴橫事迹申安撫使追還自是無撓政者轉奉議郎差丞永春縣會朝命濱海諸縣置造戟舡州牒彥輝權知晉江縣事彥輝至令主吏曰民賦有定不可加斂縣帑有所謂本錢者盡刷出以充其用縣例造九舡其成獨先差知同安

縣裏山表海寇盜陸梁彥輝申安撫司創築城壁周  
環六里安撫司奏保與減磨勘二年尋以使牒監納  
軍倉苗米剷除積弊奸人不得逞乃擢拾專斗註誤  
欲以汙彥輝已而監司按覈果於彥輝無毫髮瑕疵  
可指卒贈太中大夫

山府志

吳公誠字君與大觀三年進士調古田縣尉政和初  
谷公誠擒利寘諸法盡散其黨改承奉  
致仕公誠清介歷官三十年凡衣服  
悉因鄉里市致未嘗取之民奉祠日  
費用之外餘悉委於官至十緡死之日

家無餘貲云

出方志等書

李持正字季秉少與諸父宗師馳名大學號大小李  
宗師政和二年進士第二持正五年進士歷知德慶  
南劍潮陽三郡在南劍日適魔寇入州境諸將督捕  
急持正力爭以愚民無知戮其渠魁數人餘悉令歸  
業孫揆以祖蔭為於潛尉屬孝宗為高皇舉慶典揆  
上頌堯賦文詞奇古有旨宣付史館改知永春縣轉  
承議郎通判泰州陳俊卿惜其有翰苑才方欲大用  
未之任而卒家有依農亭內闢一書室朱文公書敬  
義齋三大字以扁之

出方志

蘇輝字天寵與弟棧同入太學聲華籍甚元符三年同登進士第提舉成都府學事乞便親移淮東時棧適提舉淮西至是父老二子迭迎養人為築華萼亭于兩淮界上入為國子司業所取程文與新經不合補外知泉州福建三州及順昌府召為禮部侍郎丐祠祿欽宗即位再以禮部侍郎召適時多故乃戒諸子曰吾不能死君難而苟竊君祿非吾志也乞致仕加太中大夫充徽猷閣待制卒棧字公美入太學時以書謁蘇軾軾喜而延之與叙宗盟官終國子司業以文學清介為徽宗所獎眷棧孫績以遺澤補官知沙

縣時有黥涅者數十百操戈鼓譟而出陌上無番行  
績徐起束帶盛服徒而往令三數輩前導衆知為績  
來却立不敢動績曰長官獨不可白乃弄兵俱死耶  
即汝一來吾能更活汝明日自外來無遽色悉令言  
狀得所為主者名乃於庭下搥殺之謂吾殺是則汝  
曹東活也林艾軒銘其墓稱其為海內豪雋云

雜出何志

書等

林伸字伸之孝子攢之後兄偉天聖五年進士承事  
郎楚州錄事叅軍伸嘉祐二年進士內侍程昉陳屯  
田實邊之策欲閉舊河開新葫蘆河於孟家口滄景

德棣四州俱被其害伸條以聞昉劾伸褫一官知新  
會縣民有以獲盜賞迎合其子者伸知之責其子曰  
朝廷數路求賢汝不能讀書應選乃欲陷我斯君耶  
竟寢之邑多諸司職田歲歛伸放其租稅十之九吏  
持不可伸曰不過為民一衝替耳後果符吏言伸恬  
不為意兄弟七人其三貧不能自給伸推俸入為畢  
婚嫁族黨窘乏者悉周之以朝奉即致仕

出萬志

黃宣政和二年進士任辟雍博士出知遂平縣時李  
彥附蔡京力助公田脅制州縣有奸民王時乞籍遂  
平之租以供延福內藏凡三奉御札專委檢按宣屢

為執奏至遣中使周詢到縣覈實宣復以身扞之得  
免由是蔡州十邑惟遂平獨無公田後召為太學博  
士卒

出岳志

余黃吳李蘇林傳第十五

鄭濟方廷寶王晞亮傳第十六

鄭濟字興采露之後未冠遊太學文藝穎拔第元豐五年進士調潮州司理就移端溪令先是縣官踵死濟至詢其故曰縣廨有古木妖當具牲牢禱之濟戒工伐木妖遂絕中丞石豫蔡京客也欲薦之臺職濟力辭居卽官不遷者四年出知海州移衢州改亳州皆出蔡意亳境接陳宿盜滿藪濟推行保伍之法道無拾遺召赴闕改提點荆湖南路刑獄陞辭徽宗曰湖湘多盜賊卿以何道處之濟以元豐保伍為對上曰神考此法正為盜賊設也卿其勉之濟至湖湘力



推行之盜賊屏息受代赴闕上慰勞甚厚除知泉州  
尋得祠請致仕卒

出何志  
等書

方廷實字公美長官廷範之後由舍選政和五年賜  
進士出身累遷御史臺檢法官時相秦檜方主和議  
虜使張通方來議和一時名士大夫皆以為不可廷  
實疏言臣每論和議之無益徒沮將士之氣啓姦雄  
之謀今使人以江南詔諭為名或傳陛下欲屈膝受  
詔則臣不知所謂也嗚呼誰為陛下謀此也天下者  
中國之天下祖宗之天下群臣萬姓三軍之天下非  
陛下之天下陛下有祖宗積累之基有長江之險有

甲兵之衆群臣萬姓三軍皆一心欣戴陛下陛下縱  
未能尅復神州尚可保守江左何遽欲屈膝於虜乎  
陛下縱忍為此其如中國何其如先王之禮何其如  
天下之心何除監察御史時林師說餉廣東與循州  
韓京交奏事下御史廷實抗疏言韓京有方面功或  
易置有乖兵民心寧移林師說於是移師說廣西京  
語及則曰方非媚事於林者平心乃爾佛地位人也  
尋以宗正少卿被旨宣諭三京淮北廷實至京西先  
朝謁陵寢見來昌陵而下皆遇驚犯泰陵至暴露廷  
實解衣而覆之比還檜預使人戒之曰見上幸無言

及他事且約以美除廷實曰欺君之事吾不忍為及見上歷歷涕泣言之遂求外補不許請益力除直徽猷閣提點福建刑獄至則首疏請解官贖胡銓罪檜益銜之時海寇竊發廷實謂必得習歷風濤之人用之此以盜禦盜法也有鄭廣輩由此途得武弁廷實延見詢究不以往事遇之其人得自竭盜相繼遁去先是福建有月輸列肆行戶等第謂之鋪例亦曰免行錢既入委府又設為和買廷實奏削其例泉州未上丁內艱服闋除廣南東路提刑有挾檜勢為威福者廷實廉得其實案之章再上不下遂上章納祿未

報卒于官廷實負才識善鑒裁歷官所薦多知名士  
如林安宅龔茂良何大圭傳自得林孝澤吳逵宋藻  
黃濟皆一時選也尤攻詩律有集行於世

志方

王晞亮字季明莆田令保隆之後從兄晞韓宣和六  
年進士紹興間樞密樓炤宣撫關陝辟為屬還改京  
秩屬朝廷欲借兵西夏倚角金虜差管押生蕃三百  
余口歸夏國道無踈虞累遷大理少卿方廷實宣諭  
陝西嘗贈以詩晞韓和之曰誰憐定遠不生還驛騎  
翩翩出漢關未肯西風回馬首要傳飛檄過千山時  
秦檜方主和議深疾之誣以他獄欲寘之死上閱其

勞移潯州赦歸卒晞亮宣和初貢入太學連中九魁  
陞上舍紹興元年釋褐賜同進士出身歷建汀教授  
福州宗教初秦檜為太學正晞亮為學錄及檜當國  
冀為已助晞亮歸然守正檜知其不附已罷授福建  
安撫司幹官兩任會山寇發請兵于朝帥委晞亮從  
軍俾按諸將方畧晞亮調護諸將區處得宜寇皆束  
手請命諸司列薦檜終憾之復差通判台州自居選  
調十九年方改秩既又投閑五年檜死始以國學博  
士召甫半年除吏部員外郎奏乞優取經義之士詞  
賦人才不得過十分之三遷工部侍郎前國子祭酒

不四年拜給事中金亮渝盟據淮甸晞亮舉李寶於  
偏裨中為水軍統制卒焚虜萬艘晞亮伯介一時綴  
駁聳人觀聽尋以定奪朝士忤權要出知漳州終更  
以秘閣脩撰致仕卒晞亮天性忠純長身方面為高  
宗所器平日自謂立身當有本末最惡進不由道故  
多積忤尤粹經術所著述多取講解六藝是非而折  
衷之前後裒集詩賦序記等文百五餘篇號過庭遺  
錄子五人皆蔭補官姪林淳熙八年進士晞韓子也

志出方

太冲字元邃晞亮曾孫也擢嘉定元年第為潮陽尉

歷湖北浙東提刑司檢法官獄議平恕不苛知吉水  
縣兵饑按產敷糴官不抑價巨室樂從從桂帥趙師  
恕辟經略司幹辦公事會宜卒據城叛以帥檄攝州  
事併力夾攻梟賊全城知梅州力爭不收浮鹽改大  
宗正丞輪對言陛下何不以太平責宰相以讜言責  
臺諫侍從以富强責主兵財者又言今君子屢招而  
不至得無有後漢魏仲英之嘆者乎

漢書魏桓字仲英安陽人桓帝

時數被徵共鄉人勸之行桓嘆曰今後宮千數其可損乎庶馬萬匹其可減乎左右悉罷家其可去乎遂

隱身除考功郎中以郎班對言括田權契遣使興利

非使兼禮部郎中去尋兼國史院編脩官實錄院檢討官

輪對言頃考太學秋試參詳省闈論體貴精圓而今  
麤疎策體貴明整而今繁冗賦亦引語錄殆類方言  
宜有以變之理宗他日語大臣曰王太冲所論文体  
誠是以風聞罷奉祠除知汀州需次卒太冲性方疎  
俸入奉親外與諸弟共之自少擅聲律多通古書惟  
以理學為質俚而非之有奏議等集凡數十卷

述事

鄭濟方廷實王晞亮傳第十六



潘李陳游傳第十七

潘慎脩字成德父承祐仕閩後歸江南仕李景至刑部尚書致仕慎脩少以父任為秘書省正字累遷至水部郎中兼起居舍人開寶末王師征江南李煜遣隨其弟從鎰入貢賁宴錢求緩兵留館懷信驛旦夕捷書至郎吏督從鎰入賀慎脩以為國且亡當待罪何賀也自是每群臣稱賀從鎰即奉表請罪太祖嘉其得體遣中使慰諭供帳牢餼悉加優給煜歸朝以慎脩為太子右贊善大夫煜表求慎脩掌記室許之煜卒改太常博士淳化中秘書監李至薦之命以本

官直秘閣俄與直昭文館韓援使淮南巡撫累遷倉部考功二部郎中咸平中又副邢昺為兩浙巡撫使俄同脩起居注景德初上言衰老求外任真宗以其儒雅宜留秘府止聽解記注之職數月擢為右諫議大夫翰林侍讀學士初寇準數毀慎脩及準守鄧有告其不法者詔慎脩驗治乃密疏準才堪將相所坐皆註誤不足罪時稱長者慎脩風度醞藉博涉文史多讀道書善清談先是江南舊臣多言李煜闇懦事多過實真宗一日以問慎脩對曰煜或懵理若此何以享國十餘年他日對宰相語及之且言慎脩溫雅

不忘本得臣子之操深嘉獎之當時士大夫與之遊者咸推其素尚然頗恃前輩待後進倨慢人以此少之子汝士官至工部員外郎直集賢院

出宋史本傳等書

李欣字公愉後埭人也曾祖丹唐宗室蔡王蔚八代孫為虢州刺史貶莆田令咸通十五年以金州刺史召還方被命卒葬松嶺茅洋遂家于莆子崇校書郎梁改唐祚崇嘆曰吾寧能為劉國師耶棄官歸欣其孫也第太平興國八年進士歷階州推官自知州以下皆坐買馬得罪欣獨免由是以清謹聞石對擢通判耀州時關輔盜賊充斥欣陳討捕之策踰月悉平

改知儀州忽傳寇至民將避去欣登城顧瞻笑曰何  
狂寇敢犯我邪及探騎至果渭州兵討虜還耳拜屯  
田員外郎出知解州久雨壞鹽池欣繕治溝塹課大  
羨詔留再任以屯田郎中知福州有善政民繪像冲  
靈觀祠之歷廣東廣西京西轉運使始仁宗爲太子  
欣處師儒及卽位賜璽書褒問除衛尉卿遷諫議大  
夫卒子八人宗元宗閔相繼登第餘以奏補入官

何志  
等志

李德昭字子晉其先自會稽徙溫陵至評始遷莆之  
北郭德昭之曾祖也德昭第崇寧五年進士歷兩浙

提舉國子博士除知和州朝廷議選常平官今赴闕  
親諭遣之諸路凡八人而德昭提舉廣東賜對稱旨  
留除度支郎官建炎初差知建州州卒三百人先屯  
廣州至是聞葉儂賊平徑還郡疑其從叛或請殺之  
德昭力言不可而止三年叛將苗傅劉正彥敗走入  
閩韓世忠追獲正彥而傅逸德昭分兵守隘獲傅檻  
送京師時提刑林杞爭功朝廷不能決僅論功轉朝  
奉郎德昭尋謝病歸隱于北山築庵名待盡戒諸子  
毋得蔭叙占仕版陳俊卿列其事狀於朝而賞格竟  
不行後建人思之祠于白鶴山弟德暉字子光政和

八年進士任陽江令

出何志

陳鶴字聞野天資醇謹宣和六年第進士調海陽尉  
擢建安丞秩滿轉惠州僉判惠俗僻陋士風不振守  
吳達老與鶴同志大興學校鶴親典教事執經者歲  
數百人鶴乃捐僉判廳所得鹽倉籬頭利市錢置學  
田以增廩又表置學官自後文士彬彬惠之傳學實  
自鶴始轉朝奉郎廣州通判海寇倡厥帥遣鶴督捕  
鶴歛兵示以無事俄而掩襲擒三百餘人兵官貪功  
請悉誅戮鶴原其脅從者二百餘人逾年以疾卒于  
官

出方志

又有游輔者字宋卿舉重和元年進士歷任

宣敎郎知潮陽縣值梅州徭賊起朝廷特除知梅州  
輔威名夙著比入境群盜斂迹遁去郡治肅然未  
憂解官詔起復知象州卒

出何志

潘李陳游傳第十七

林蘇王陳林傳第十八

林宋卿字朝彥仙遊縣人崇寧五年以舍選登進士  
第初娶三山鄭俠孫女所獲奩資不為已有寒賸出  
京者例厚贐之西歸道出通州與年友廖剛拜陳了  
翁求救了翁徐曰頭項直宋卿言下領悟所得為多  
又嘗從楊龜山游故立朝行已多遵二先生之槩矧  
試秘書省正字權直翰林學士院出知恭州時邊臣  
多以開拓蒙賞瀘南帥司因奏開溪費州南通辰沅  
西抵瀘戎置一州二縣夔梓二路聽其節制宋卿上  
疏反覆數千言其略曰溪費州檢踏切恐生夷疑惑



別致生事大率得其地不足耕得民不足治若不杜窒其源則接武邊功者衆寧不斷喪六十州生民之命脉乎徽宗覽奏惻然詔罷其役帥臣禡官命宋卿無提舉夔州潼川府路兵馬都監仍知恭州時二漕皆出龜山之門隨亦合奏開陳其不可龜山聞之曰觀復和卿朝彥三子學同方真百鍊鋼也未幾思州納土夷官田祐恭與弟祐祥為怨家告密憲臺欲寘極刑朝命宋卿諭其獄宋卿至察其誑誤者釋之以事干邊防乞從末減奏至上大喜時尚書省令夔路十萬緡克燕山軍需宋卿稟漕以保障繭絲當權

輕重變門至隘人心易搖末產下戶當爲蠲削故恭  
民德之尤深官滿運判張深與部使者薦宋卿治行  
乞畀再任上曰是嘗奏罷溪費州役者姑與再任以  
寬朕西顧憂宋卿蠲恭民宿逋二十萬八千四百五  
十餘緡米十五萬四千三百石有奇自受俸非祿令  
所著者一介不取家繪生祠奉之靖康中以煩言得  
旨衝替諸公賦詩祖餞馮時行詩云並游英俊顏如  
甲頌德鸞謠口卽碑假使當時頭項縮了翁泉下也  
相嗤僑寓涪陵之朝亭日與其士大夫唱酬歌咏以  
自適涪人以宋卿才學出處與黃太史相先後因號

為小涪尹和靖見之曰溪費一奏皆自養氣中得之  
後薦於張浚浚以元樞宣撫川陝辟宋卿叅謀軍事力  
辭建炎三年詔四川監司舉流寓之才能者以聞涪  
守王擇仁薦宋卿學識純正氣節剛方可備中興任  
使遂召赴闕河北帥臣奏兵興機密帥幕叅謀以儒  
知兵以節全城無出於林宋卿者得旨差充湖南帥  
司叅議浚復由相府出都督衆復推宋卿赴督府稟  
議嘗條湖北事宜及兵籌五利等集浚視師江上欲  
辟為宣撫判官宋卿辭以家累寓涪欲挈東歸浚還  
朝首薦之蒙召力丐祠歸里終朝請大夫弟宋臣宋

徵皆宋卿自教導後同時登第

出何志

有之字公作

宋卿之曾孫也嘉定十年第進士授賀州司法居民以茅竹為屋有之請于州代以土瓦賀民之有棟宇自有之始再調肇慶司理獄訟平允郡守賢之命攝教官條陳修城誣賴索佐受詞蠶船稅重脩火政築舊壕六事以獻守轉聞上允之劄示二廣民蒙其惠通判建昌軍攝郡總所綱運不辦有之積俸錢補發秩滿知南雄州未至而卒同邑有丘獻字渭夫少嗜讀書尤明於周禮繇鄉舉補太學寶慶二年進士第五人調昭慶軍節度掌書記再調江東提刑司幹官

諸公交薦其賢除太學錄尋除大理寺司直卒于官  
獻為人長厚與同列無間言鄉人葉大有尤敬重之  
官至奉議郎

出仙  
紹志

蘇欽字伯臣與莆侍郎燁同祖自都統領軍使益入  
閩子孫散處泉之屬邑至欽始自德化遷居仙遊宣  
和六年登進士第歷惠州錄參時盜賊充斥郡將務  
立威捕至輒寘之法欽白曰盍少須之審讞得實加  
戮未晚郡將怒以為縱賊將劾之欽不懾會審者至  
果平民得免丁外艱哀毀骨立廬墓六年不忍置墨  
衰調知閩清縣帥張浚嘉其廉退且有治劇才易治

閩縣與漕使賀允中交薦之改知新建縣時諸邑多積欠郡責盡數催徵欽獨爭之曰民力告竭二稅分斂及常歲足矣若加筆筭責辦為民父母何忍為之吾有去爾守不能屈辟廣州機幙攝倖事會預押舶例賞一資遜之同僚改江西帥屬值贛卒叛帥憲爭致之寇平論功以欽居首擢守巴州陞辭高宗諭之曰巴去朝廷遠甚卿到宜存撫百姓務令鎮靜欽奏曰臣當先布朝廷寬大之恩期於不擾上首肯之巴無迂兵例出脚乘三千緡欽悉封還以代輸賦改知閬州自俸給外例錢互送皆不受尋除利路轉運使

時吳璘屯重兵於興元知欽出張浚之門深加敬愛  
每行部至其州輒厚禮迎犒留館於第宴饗之外饋  
道甚厚一無所受璘愈敬之尋以疾終欽廉儉出於  
天性政事基於文學割俸市田分給諸弟扁其堂曰  
富義自爲記以示子孫俾引而勿替云

出方志

沈字澄老以父欽蔭補官調餘干尉時令丞簿皆不  
事事監司郡守委送叢至沈予決精敏丞相趙汝愚  
其邑人也時方魁天下喜沈廉介有守折節與交改  
秩知臨川縣縣有逋陂久廢沈勸富民分治之民蒙  
其利時經錢缺解至捐俸代輸秩滿質錢治裝作賓

州張南軒帥桂林知其父為魏公所知且喜洸有父  
風檄攝帥府又攝高州尋以廉吏舉之經略劉淳  
繼至又攝桂府武弁陳姓者以鬻爵為邊吏交通諸  
蠻納賄巨萬事覺逮獄當路有為之地者觀望莫能  
決屬洸治之卒正典刑一府肅然除知雷州時母頽  
人年七十七聞洸治獄事多所平反喜曰昔人以平  
反悅其親今吾可無憂矣秩滿赴闕面陳三劄一乞  
折納徐聞丁米以便民二乞籍海舟以戢奸盜三乞  
戒約廣西軍寨不得差人回易孝宗嘉納除知新州  
陛辭賜對便殿又陳二劄一請易常平陳米除豁耗



析虛數一請降旨經理邊江被水民田租稅上稱善  
久之趣之郡比至百姓歡呼迎之歌曰蘇使君來何  
晚使我夜不寐朝不飯州賦額儉帑無羨餘月給廩  
俸皆先屬吏去日持空券出嶺移封州有請減放丁  
米及經制無額之數丁內艱服除知辰州辰舊無貢  
院惟附常德試至洸始試于州士子便之尋退休扁  
所居之軒曰止足親戚或有請托者謝曰吾居官曾  
不以已徇人其可強人以徇已乎年七十八卒洸舅  
次坦夷表裏洞徹為政務興利除害不以發擿為聰  
明故所至民安所去民思稱廉吏云

出方志  
等書

權字元

中少侍父洸倅賓州嘗從張南軒學從父國學博士  
繼繩爲鄉名儒權復參扣焉故其學問日積繇太學  
登淳熙十一年第調梧州推官帥蔡戡聞權世有廉  
名檄攝帥屬調三山教官訓迪不倦改秩知餘干縣  
洸舊治也至官卒人多痛惜之權子國台從瓜山潘  
柄受學從孫三英早登洪天錫徐明叔之門克世其  
家學云

出方志

王回字景深曾祖尋駕部郎中父惠守大理寺丞回  
少事親孝第熙寧六年進士累官松滋縣令荆沔俗  
用人祭鬼回補治甚嚴其風遂革監陳留縣酒提點

刑獄羅適以回不自表襮率尹顧臨等共薦之改知  
鹿邑縣歲餘邑人狀其治行乞留者萬餘人召爲宗  
正簿充睦親宅講書回與鄒浩相友善哲宗立賢妃  
劉氏爲后浩將論之以告回回曰事寧有大於此者  
乎予雖有親然移孝爲忠亦太夫人之素志也及浩  
南遷人莫敢顧回欽交遊錢爲之治裝往來經理且  
慰安其母事聞逮詣詔獄衆爲之懼回居之晏如御  
史詰之對曰實嘗與議不敢欺也因誦浩所上章幾  
二千言獄上除名停廢徒步出郤城行數十里其子  
追及問以家事不答徽宗立召還舊官權監察御史

數日以疾終年五十二侍從臺諫上章乞錄其子恤其家以獎勸忠義召除其子渙老郊社齋郎蔡京為相奪之仍列名黨籍

出宋史本傳等書

陳開字發明以太學生登熙寧六年進士第調密州教授時太守蘇軾深器重之諸生力畱更七年而後代密州儒風之盛自開始後入為太學博士召對進兩劄其一排新法其一去小人進君子言議激切當國者忌之出為雄州通判尋除宗正寺丞官至朝奉大夫累贈金紫光祿大夫蔡襄狀其行子畢元符三

年登第

出河志等書

陳覺民字達野柘山人第熙寧九年進士元祐間詔  
舉賢良方正林希錢勰以其名聞時方紛更神宗法  
度人莫敢言覺民陳役法則乞復額役邊事則乞勿  
棄地其言剴切時議欲罪之并坐舉者賴言者獲免  
知建陽縣以救荒得民心家畫像生祠之累遷宗正  
丞將大用覺民以母老乞補外歷知漳建二州擢福  
建路轉運判官移知福州故樞密安惇舊與覺民為  
同舍生情好甚篤元符間任諫議大夫中執法曾無  
片言援引及謫守長沙乃欲以覺民自代令小史持  
文書為驗意規厚利覺民笑而遣之惇由是不樂及

居政府言者承惇意劾罷尋起知泉州時有司建言  
欲權六郡酤覺民陳五不可且移書約他郡同論之  
事遂寢尋遷本路提刑兼三路都轉運使并提舉河  
渠復知泉州廣州所至有治行兩為鄉部使者凡過  
郡邑未嘗與僚屬妄交一談其風采嚴峻如此官至  
中奉大夫諫議陳瑾狀其行子璘大觀元年賜上舍  
及第官至吏部郎中宋輔政和二年進士因論二蔡  
貶餘姚縣主簿

出方志  
等書

林豫字順之熙寧九年登進士第授惠安縣尉改集  
慶軍判官淮南賊嘯聚連水軍朝廷下外臺求部吏

能措畫者衆奏豫為本軍使多設耳目賊遂就擒餘  
黨入海州復檄豫攝倖事尋亦殄滅紹聖初時相以  
豫善謀議奏授內藏副使先是朝廷既棄地和戎至  
是復寇麟州豫建議謂宜先脩葭蘆米脂安羗浮屠  
諸寨通鄜延路以為麟州應援後卒行其議歷知保  
德軍邵州四年虜人撤霸橋深入除豫河北沿邊安  
撫使豫乃策同興築虜人無能為也後因陞對哲宗  
褒獎再三元符三年除鄜延路兵馬知鄜州黃河北  
決移守冀州盡收老弱幼穉廩以官粟募少壯者築  
堤厚與之傭民賴以全活崇寧二年除真定府兵馬

知邢州力議鈔面錢陝西銅錢之弊及朝廷下本路  
折糴豫格不行數忤時宰期年罷去徽宗終思之大  
覲四年知邵武軍凡歷七郡悉有遺愛邢臺邵武之  
民各畫豫立祠初豫受知於二蘇最深軾嘗薦之有  
云勇於立事常有為國損軀之意試之盤錯必顯利  
器轍亦嘗薦之有云吏幹強敏長於應變更試迭用  
必有可觀及軾以作詩譏切下御史獄豫適賜對神  
宗問所薦謂誰豫曰蘇軾問何以識之曰臣經由杭  
州因會客識之又曰是日所談何事曰臣子所言無  
非忠孝詞氣從容略不避李定輩側目及轍貶惠州



軾貶雷州章惇恨豫餞轍詞有怒髮衝冠壯心比石  
之司左遷雲騎尉後竟坐二蘇所薦入元祐黨籍所

著有筆峰草錄

出何志等書

師益豫之次子也兄師舜靖康中以守職不肯避虜  
全家死於難官至中大夫師益以父任奏補三班借  
職授樞密院宣差雜澤縣尉上書論邊防利害譏切  
時政晉京師聽旨金虜深入臣僚以師益所論多可  
采有旨差充京畿第十四副將累授武翼郎閣門宣  
贊舍人提舉京城四壁守禦使司後軍統制虜犯京  
師侍從孫傳等薦舉差充京畿第一副將訓練馬步

軍陳留縣駐劄楊時在講筵奏師益曉達軍政使專督訓練必有績效可觀授京畿第一正將守禦鄭州原武虜至不克攻去旣而虜自滑州渡河再犯京師諸將皆遁惟師益孤軍守原武不動劉韜為丞相何桌謀亟召師益兵入援師益行次封丘遇虜迎戰大破之明日虜兵大至師益謂其副曰虜衆我寡誠不敵然此吾致命之秋尚何顧哉遂奮力戰死之一男若淵甫晬一女九歲妻葉氏及男乳母襁負南歸流離道路凡五六載抵家若淵稍長痛父暴骨原野刻木招魂葬歸僊嶺後有留題於其墓亭曰虎踞龍蟠

經幾春靖康孤節照蒼旻至今凜凜有生氣愧死當

年膜拜人

即其弟也

弟師臯通直郎後亦死於

王事朝廷特官其一子

出何志

師說字箕中豫之第三子也少舉進士知名以父蔭

屢當補官遜於從兄師文及弟師龍故入仕最晚試

銓曹第一調嚴州司士時青溪盜初平作新寨聚兵

驕甚郡請師說攝理官以緝盜之悍卒帖服遷知德

化縣還道桐廬會盜發支邑民避道乞音師白之朝

因改建德縣賊平倖新定虜犯二浙新定民大恐師

說入白郡將請靜以待之乃自擁十餘騎出城遇虜

騎謀曰吾受命主帥以城降者賞師說叱之曰吾聞

國家命不聞賊命擒斬于市以故新定之民嬰城死

守累遷兵部員外郎知建昌軍丞相趙公力薦之

舊志不著其名以拜廣東運判韓京以武將立功知

循州頗驕慢不可制師說上其姦狀後京謂人曰監

司直須還此老第於我少恩爾除浙東提點刑獄山

陰為畿內貴人多肆豪奪為民害師說一繩以法以

忤權貴力請祠歸居九年卒林光朝嘗言林郎中出

語太率如富鄭公徑截無他表裏只是一箇人其為

先正所推許如此

出何志等書

林蘇王陳林傳第十八